

Illoqarfinni nunaqarfinnilu, immap tinittarnera ulerujussuarterneralu pillugit, angallatinut umiarsuarnullu talittarfiit qarsunneqartaleriartuinnarneri, isumannaannerusumik aaqqissuunneqarnissaat siunertaralugu, UKA2022-mut naammassereersimasussamik Naalakkersuisut pilersaarudioqqullugit peqquneqarnissaannik Inatsisartut aalajangiiffigisassaattut siunnersuut.

Inatsisartunut ilaasortaq Siverth K. Heilmannimit, Atassut, saqqummiunneqartoq

pillugu

Sanaartornermut Ataatsimiititaliap

Siunnersuutip aappassaaneerneqarneranut

ISUMALIUTISSIISSUTAA

Sanaartornermut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Kristian Jeremiassen, Inuit Ataqtigiit, Siulittaasoq

Inatsisartunut ilaasortaq Anders Olsen, Siumut, Siulittaasup tullia

Inatsisartunut ilaasortaq Charlotte Pike, Inuit Ataqtigiit

Inatsisartunut ilaasortaq Emanuel Nûko, Naleraq

Inatsisartunut ilaasortaq Kim Kielsen, Siumut

UKA 2021-imi ulloq 10. november siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Angallatinut umiarsuarnullu talittarfiit aaqqissuunneqarnissaat pingaartumik immap tinitarneranik ulerujussuarterneranik ajornartorsiutit pillugit siunissami talittarfiit qarsunneqartaleriartuinnarnerinik isumannaannerusumik aaqqissuunneqarnissaat siunnersuummi matumani siunertarineqarpoq. Taamaammat UKA2022-iutinnagu iliuousissatut pilersaarummik suliaqartoqarnissaa siunnersuutigineqarpoq.

Siunnersuutip Inatsisartunit siullermeerneqarnera

Immikkoortup ukkatarineqarnissaa pingaartutut isigineqarmat siunnersuummi matumani sammineqartoq siullermeerneqarnerani tigulluarneqarpoq.

Naalakkersuisut akissuteqaateqarnerminni tulliuuttut allannguutissatut siunnersuutigaat:

”Talittarfinnik aserfallatsaaliinissami kinguaattoorutit pillugit nalunaarusiap nutarterneqarneranut atatillugu, ulittarneranut tinittarneranullu tunngatillugu talittarfiit qarsunneqartaleriartuinnarneri isumannaannerusumik aaqqissuunneqarnissaat Naalakkersuisunit ukkatarineqarnissaa pillugu, Inatsisartut aalajangiiffigisassaattut siunnersuut.”

Immikkoortup aappassaaneerineqannginnerani Sanaartornermut Ataatsimiititaliamit suliarineqartussanngortinneqarpoq.

Ataatsimiititaliap siunnersuummik suliarinninnera

Siunnersuummit siunertarineqartoq tunuliaqutarineqartorlu Inatsisartunit tapersorsorneqartoq ataatsimiititaliap paasivaa. Piffissami aggersumi ajornartorsiut annikilliarternavianngitsoq isumaqarfigineqarpoq. Ajornartorsiullu siunnersuutigineqartumit qaqinneqartoq kalaallit inooriaasiannut aningaasaqarneranullu pingaaruteqartutut isigineqarpoq.

Siunnersuutip siullermeerneqarnerani aningaasaliissutissatut pisariaqartinneqartunik immikkoortitsisoqarsimanersoq Naalakkersuisullu kingusinnerpaamik UKA2022-mut aningaasaliissutissatut pisariaqartinneqartut pillugit qulaajaasoqarsimanissaa ujartorneqarmat ataatsimiititaliamit maluginiarneqarpoq. Talittarfiit aaqqissuunneqarnissaannut apeqqummut allannguutissatut siunnersuut una imaluunniit Naalakkersuisut allannguutissatut siunnersuutaat akuersissutigineqassagaluarpat aningaasaliissutissatut pisariaqartinneqartut qulaajarneqarnissaannik ujartuineq pissusissamisoortoq ataatsimiititaliap isumaqarpoq.

Pineqartumi eqqagassalerinermi annertuumik kinguaattooruteqartoqartoq ataatsimiititaliamit isumaqarfigineqarpoq, ilaatigullu aserfallatsaaliinermut ukiumut 25,2 mio. kr.-inik aningaasanut inatsimmi immikkoortinneqartartut naammannatik. Atuisut akiliuteqartarnerat allami inissisimasoq talittarfiillu ingerlanneqarnerannut imaluunniit aningaasalersuinissaq siunnersuutigineqartumi sammineqartoq pillugu siunnersuuteqartup oqariartuutaa ilanngullugu ataatsimiititaliamit maluginiarneqarpoq.

Talittarfiit allanngortinneqarnissaannut pisariaqartinneqartut pilersaarutillu piaartumik ilisimasaqarfigineqalernissaat pisariaqartoq siunnersuuteqartumit kissaatigineqartoq ataatsimiititaliamit paasineqarpoq. Piffiit ilaanni ulittarnerup tinittarnerullu qanoq annertutigisumik ajornartorsiutaatiginersoq sumilu qarsutseratarsinnaaneq pillugit immikkut sammineqarnissaat siunnersuutigineqartumit kissaatigineqarpoq. Matumani pinasuartumik sakkortusisamillu suliniuteqartoqarnissaanut pilersaarutit sukumiisut suliarineqarnissaat pisariaqartut siunnersuuteqartumit isumaqarfigineqarmata ataatsimiititaliamit paasineqarpoq.

Siuliini taaneqartutut aalajangiiffigisassatut siunnersuummut uunga 2021-mi kalaallit nunaanni umiarsualivinni aserfallatsaaliinissami kinguaattoorutit pillugit nalunaarusiaq aallaavigalugu Naalakkersuisut allannguutissatut siunnersuuteqarput. Nalunaarusiami tassani Namminer-sorlutik Oqartussanit talittarfinnut pigineqartunut tamanut aserfallatsaaliinissami kinguaat-toorutit immikkut nalilerneqarput.

Aningaasaqarnikkut allaffissornikkullu kingunerisassat.

Siunnersuuteqartup aningaasatigut, allaffissornikkut inuussutissarsiortunut inuttaasunullu kingunissai pillugit naatsorsuutaanut ataatsimiititaliaq ilanngussassaqaqngilaq.

Ataatsimiititaliap inassuteqaatai:

Naalakkersuisut allannguutissatut siunnersuutaat **ataatsimiititaliamiititaliami ilaasortanit amerlanerussuteqartunit** Inuit Ataqtigiinnit Naleqqamillu **akuerineqassasoq** inassutigineqarpoq.


Ataatsimiititaliami ikinnerussuteqartut Siumumeersut siunnersuut pillugu oqaatigissavaat:

”Nalunaarusiat kingulliit marluk malillugit umiarsualivinni aserfallatsaaliinissami kinguaattoorutit 270 mio. Kr.-niupput.

Umiarsualivinnut aaqqissuussinissamut, ukiumut 25,5 mio. kr.-niniit 27 mio.-nut aningaasanut inatsimmut immikkoortitsinikkut, ukiunut qulinut tulliuttunut umiarsualivinnik aaqqissuussinissamut pilersaarusiortoqartariaqarpoq. Aningaasanut inatsimmit ukiut qulit tikillugit kr.-ninik immikkoortitsisoqartarnissaanut qulakkeerinnittussamik pilersaarusiortoqassaaq. Naalakkersuisunit iliuusissatut pilersaarut siulleq UKA2022-mi saqqummiunneqassaaq.”

Ataatsimiititaliami ilaasortaatinik ikinnerussuteqartunit Siumukkunneersunit Naalakkersuisut allannguutissatut siunnersuutaat tamanna tunngavigalugu **itigartitsissutigineqarnissaa** inassutigineqarpoq.

Taamatut oqaaseqarluni isumaliutissiisummillu allassimasutut paasinnilluni matumuuna ataatsimiititaliap siunnersuut aappassaaniigassanngortippaa.



Kristian Jeremiassen
Siulittaasoq



Anders Olsen
Siulittaasup tullia



Charlotte Pike



Emanuel Nûko

Kim Kielsen